

19 NOV 2002

Kabinet-Lantik

JAMALUDDIN JARJIS DILANTIK MENTERI KEWANGAN II

KUALA LUMPUR, 19 Nov (Bernama) -- Anggota Parlimen Rompin dan Pengerusi Tenaga Nasional Berhad, Datuk Dr Jamaluddin Jarjis, dilantik sebagai Menteri Kewangan II.

Pejabat Perdana Menteri, dalam satu kenyataan hari ini, berkata Yang di-Pertuan Agong telah berkenan dengan cadangan Perdana Menteri Datuk Seri Dr Mahathir Mohamad berhubung pelantikan itu.

Seri Paduka Baginda juga berkenan dengan cadangan Perdana Menteri untuk melantik Datuk Tengku Adnan Tengku Mansor sebagai Menteri di Jabatan Perdana Menteri dan Senator Datuk Zainuddin Maidin sebagai Timbalan Menteri Penerangan.

Tengku Adnan sebelum ini adalah Timbalan Menteri di Jabatan Perdana Menteri dan Zainuddin adalah Setiausaha Parlimen Kementerian Penerangan.

Upacara istiadat Pengurniaan Surat Cara Pelantikan kepada ketiga-tiga mereka dan istiadat Mengangkat Sumpah Jawatan dan Taat Setia serta Sumpah Menyimpan Rahsia akan diadakan di hadapan Seri Paduka Baginda di Istana Negara Khamis ini.

Pelantikan ketiga-tiganya berkuatkuasa dari tarikh mereka mengangkat sumpah, kata kenyataan itu.

Jamaluddin, 51, seorang doktor falsafah dalam kejuruteraan elektrik dan usahawan dalam sektor tenaga, berkahwin dengan Datin Dr Kalsom Ismail dan mempunyai empat orang anak.

Beliau adalah anggota Majlis Tertinggi Umno bagi penggal 2000-2003 dan Timbalan Ketua Umno bahagian Rompin.

Jawatan Menteri Kewangan Kedua diwujudkan buat pertama kali dalam kabinet Dr Mahathir pada 1998 apabila Datuk Mustapa Mohamed dilantik memegang jawatan itu.

Selepas pilihan raya 1999, Dr Mahathir bagaimanapun tidak melantik menteri kewangan kedua apabila Mustapa gagal mempertahankan kerusi parlimen Jeli, dan melantik semula Tun Daim Zainuddin sebagai Menteri Kewangan sehingga Jun 2001.

Sejak tarikh itu, portfolio Menteri Kewangan dipegang oleh Dr Mahathir yang dibantu oleh dua timbalan menteri terdiri Datuk Dr Shafie Salleh dan Datuk Chan Kong Choy.

Jamaluddin dilantik timbalan pengerusi TNB pada 5 Ogos 2000, dan pada 1 Sept 2000, dilantik sebagai pengerusi bukan eksekutif TNB.

Kontraknya dengan TNB dilanjutkan selama dua tahun mulai 1 Sept 2002 setelah kontrak dua tahunnya tamat pada 31 Ogos 2002.

Jamaluddin yang dilahirkan pada 25 Mei 1951 di Pekan, Pahang, memperolehi Ijazah Sarjana Muda Sain dari University of Manchester di United Kingdom pada 1974, dan Ijazah Sarjana dari University of Manitoba pada 1977, dan ijazah Doktor Falsafah (Kejuruteraan Elektrikal) dari McGill University di Kanada pada 1980.

Antara 1974 dan 1980, beliau menjadi pensyarah di Universiti Teknologi Malaysia. Dalam tempoh itu, beliau menjalankan beberapa program penyelidikan dan pembangunan berhubung industri tenaga.

Penglibatan beliau dalam sektor swasta bermula pada 1981 apabila menjadi jurutera perunding di J&A Associates, dan pada 1984, dilantik pengarah urusan EPE Power Corporation Bhd.

Pada 1988, beliau menjadi pengerusi Koperasi Belia Nasional (KOBENA).

Tengku Adnan, 51, merupakan seorang usahawan sebelum menceburi politik. Beliau berkahwin dengan Datin Tengku Fatimah Yasmin Tengku Ismail.

Beliau dilantik sebagai Senator pada 13 Dis 2000 sebelum dilantik Timbalan Menteri di Jabatan Perdana Menteri pada 17 Jan 2001.

Tengku Adnan adalah Setiausaha Kerja Umno dan Pengerusi Badan Perhubungan Umno Wilayah Persekutuan serta Pengerusi Barisan Nasional Wilayah Persekutuan.

Sebelum ini, beliau merupakan ahli Majlis Tindakan Ekonomi Negara (MTEN).

Tengku Adnan menceburi bidang politik pada 1984 apabila dilantik sebagai ketua Umno Cawangan Kampung Bakti dalam Bahagian Seputeh dan pernah memegang jawatan sebagai Bendahari Pemuda Umno pada 1988. Beliau dipilih sebagai anggota Majlis Tertinggi Umno pada 1993.

Tengku Adnan dilantik sebagai Setiausaha Kerja Umno pada Julai 1999. Beliau juga merupakan anggota lembaga pemegang amanah Yayasan Gerak Bakti Kebangsaan.

Senator Zainuddin, 63, yang lebih dikenali sebagai Zam, adalah seorang wartawan terkemuka sebelum dilantik sebagai Senator pada 25 Feb 1998 dan seterusnya sebagai Setiausaha Parlimen Kementerian Penerangan pada 17 Jan 2001.

Berkahwin dengan Datin Zaiton Zainor Abidin dan mempunyai dua anak - Zakinah dan Zaidan, beliau memulakan kariernya sebagai wartawan sambilan dengan Utusan Melayu pada lewat 1950-an di Alor Star.

Pada 1960, beliau menyertai Utusan Malaysia sebagai wartawan penuh sebelum dilantik sebagai ketua pemberita pada tahun 1962. Kerjayanya dalam bidang kewartawanan terselah sehingga dilantik sebagai Ketua Pengarang pada 1982.

Sepanjang pembabitannya dalam dunia kewartawanan, Zainuddin turut menulis beberapa buku seperti "Mahathir Di Sebalik Tabir" dan "Tun Razak: Jejak Bertapak Seorang Patriot".

-- BERNAMA

AT MFJ MAI ZS MOZ